



TE KANIVA

FAKANOFOGA A TUVALU MO
MAFULIFULIGA O TAU-O-ASO
2012



Folanga a Tuvalu i loto i Mafulifuliga o Tau-o-Aso

Fakasologa o Tusitusiga

| | |
|---|----|
| Muna fakatomua | 2 |
| Takutonuga | 3 |
| Fakamatalaga kamata | 6 |
| Mafaufauga o fai te Fakanofoga tenei | 7 |
| Mataupu taua ne takitaki ki ei te fakatokaaga tenei | 8 |
| Pogai ne faite ei te Fakanofoga tenei | 10 |
| Tapula, Galuega fakamoe mo Fuataga o te Fakanofoga | 12 |
| Fakagaluega o te Fakanofoga tenei | 27 |

Muna Fakatomua



Ko fiafia lasi au o tuku atu te Fakanofoga muamua loa a Tuvalu mo Mafulifuliga o Tau-o-Aso tela e fakaigoa ko “*Te Kaniva*”.

Te Kaniva ko te fuataga ne maua mai i faipatiga ko la ne fai mo fenua takitasi i loto i te atufenua tela ne fai i te tausaga 2011. Ne aofia i faipatiga konei ko tino mai tulaga kesekese i loto i fenua pena foki mo fakapotopotoga o fenua kesekese i luga i te laumua. Ne fakasoko atu mai tua o faipatiga konei ko te Fonotaga lasi fakapitoa mo Mafulifuliga o Tau-o-Aso tela ne fai i po 30 o Setema 2011 mo se aso e tasi.

Ne kaufakatasi atu ki te Fonotaga ko Takitaki mai Falekaupule mo Kaupule o fenua takitasi o Tuvalu, Takitaki i loto i Matagaluega o te Maloo, Takitaki mai lotu kesekese, Tamaliki akoga mai akoga lasaga muamua, lua mo akoga maluga atu pena foki mo Sui Malu o te atufenua ki loto i te Palamene. A te fono ne fakapitoa mo te fakapatonuga o manatu ko la ne avaka i taimi o faipatiga mo fenua takitasi fakatasi mo te fakataliaga o te Takutonuga (Communicué) tela ko te fakavae taua o te Fakanofoga tenei.

E aofia i loto i *Te Kaniva* ko fakamoemoega o tino Tuvalu ki auala lei kae tau o agai atu ki fakalavelave mo pokotiaga e mafua mai i mafulifuliga o tau o aso. Galuega fakamoe konei ko la e fakatapula mo se taimi toetoe mo te taimi tai leva, e aofia iei galuega o fakafoliki te fakamafua o keesi lailai ko la e fakamasei ki te vanimonimo mo galuega o agai tonu ki fakalavelave mo pokotiaga, e fakamatala i loto i Tapula e fitu. A galuega konei e togi mafa tela e se mafai ne maumea mo te iloa o tatou o fakataunu. Te mea tenei ka fai mo fakalavelave lasi ki luga ia tatou, kae ui iei a tatou ke sa loto vaivai kae ke loto malosi o fakataunu a fakamoemoega konei. E talitonu au me mai luga i fesoasoani tau tupe o maloo o fenua mai tua atu o Tuvalu mo niisi fakapotopotoga, ka mafai kii ne tatou o fakataunu a fuataga konei e fakamoemoe tatou ke maua i loto i *Te Kaniva*.

E fiafia lasi au o fakaoti taku faipatiga o fakaoko te fakafetai lasi ki Takitaki katoa o te atufenua i tulaga kesekese mo te lago maloo ne latou a te galuega tenei ne fai o fakatoka te Fakanofoga tenei. E fia fakaoko foki taku fakafetai lasi ki tino katoa ko la ne galue fesoasoani i taimi ne fai ei faipatiga o fakatoka te Fakanofoga tenei. Maise taku fakafetai ki te Potukau mai Matagaluega o te Maloo, tino galue o te Matagaluega o te Enivalomene mo te Minisituli o Malo-ki-Tua, Fakataukoloo, Tualisi, Enivalomene mo Leipa, tino atamai mai te SPREP mo te SOPAC mo te galue lasi ne panaki mo latou i te fakatokaga o te Fakanofoga tenei. E avatu foki taku fakafetai lasi ki te Malo o Ausitalia, fakapotopotoga ko te SPREP mo te SOPAC mo polotieki ko la e fakatele nei i loto i te atufenua kae e fakatupegina ne te GEF, mo te fesoasoani tupe tela ne fakaoko mai mo fakataunu te galuega ki te faitega o te Fakanofoga tenei.

Fakafetai lasi. TUVALU MO TE ATUA.

Hon. Apisai Ielemia

Minisita o Malo-ki-tua, Fakataukoloo, Tualisi, Enivalomene mo Leipa



Fonotaga mo te Mafulifuliga o Tau-o-aso i Tuvalu

Folauga a Tuvalu i loto i Mafulifuliga o Tau-o-Aso

30 SETEMA 2011

TAKUTONUĞA

Matou a sui ki te Fonotaga a te Atufenua mo Mafulifuliga o Tau-o-Aso ne fai i te Tausoa Lima Falekaupule i Funafuti i te po 30 Setema, 2011, e aofia iei Ulu Alike, Hui Tupu, Ulu Fenua, Pule Fenua, Pule Kaupule mo sui o fenua, sui o fakapotopotoga se kau i te maloo mo pisinisi, talitonuga kesekese i luga i te laumua, minisita ote kapineta, sui ki te fale o palamene, sui o te maloo i ofisa mai tua atu o Tuvalu, tino galue i te maloo mo sui mai fapotopotoga mai tua o Tuvalu, taugasoa fesoasoani mai tua atu o Tuvalu.

Amanaiagina te taaua o titiga manatu fai i faipatiga fakatasitasi tela ne talia iei te fakavaega o te Fakanofoga mo Mafulifuliga o Tau-o-Aso o Tuvalu, mo te Palani Saukatoa mo Galuega fai o te Atufenua i te Mafulifuliga o Tau-o-Aso pela foki mo fakalavelave tupu.

Fakapatonugina ei te galue fakatasi mo te atiakega tokagamalie o Tuvalu.

Lagomalo te tulaga matakite o te Malo o agai atu kae fakafesagai ki pokotiaga mo mafulifuliga o tau o aso i te faitaga o te Fakanofoga mo Mafulifuliga o Tau-o-Aso o te Tuvalu mo te Palani Saukatoa ke takitaki a taumafaiga o galue fakatasi o fakapatonu i ei a te tou fakamoemoega mo atiakega kola e sae i loto i te Te Kakeega II mo ana kiloga fou mo aso mai mua.

Fakapatonugina te taaua o te tulaga o te Kaupule i te fakagaluegaga o galuega fai o mafulifuliga o tau o aso i fenua takitasi.

Fakamasauaga te tou pokotia i fakalavelave i te lalolagi i mafulifuliga o tau o aso, maise mo mea kola e feagai mo tatou i te vaitaimi nei i te tulaga fakamataku o tau o aso. Tulaga masei kii o tau o aso e fakalasi ne ia a mea tupu kola e tofotofo iei te mafai o tatou, tela e kilo fakamalalogina iei tulaga o Tuvalu, tela ko fakatulaga iei Tuvalu ki se tulaga pokotia malosi ki mafulifuliga o tau o aso.

Kalaga fakavave ki fenua o te lalolagi ke lagomaloo a te fakatumauga o te Feagaiga o te lalolagi (Kyoto Protocol) kae ke fai se faiga fakavave o gasuke ki se feagaiga saukatoa tela e aofia iei a auala kola e fakafoliki iei a keesi masei.

Sagatonu o fakagalue fakavave a te Fakanofoga mo Mafulifuliga o Tau-o-Aso mo te Palani Fakagalue mo Mafulifuliga o Tau-o-Aso pela foki mo fakalavelave tupu.

Fakatagi fakavave ki se fesoasoani mai taugasoa fesoasoani ki te fakavavega o fakamaua mai a tupe mo fai a galuega o agai atu kae ke fakafoliki a fakalavelave i tau o aso ke ulu i loto i feagaiaga ko te UNFCCC, Kyoto Protocol mo niisi fesoasoani aka ke mafai o fakagalue iei a te Fakanofoga mo Mafulifuliga o Tau-o-Aso mo te Palani Fakagalue pela foki mo fakalavelave tupu.

Ko taliagina fakatasi a te kiloga mo tapula taaua o te Fakanofoga mo Mafulifuliga o Tau-o-Aso i Tuvalu ke mafai o fakagalue a te kiloga tenei:

Ke puipui a Tuvalu pela me se atufenua tutokotasi mo ana tuu mo ana faifaiga kae ke fakalei aka foki a tena mafai ke maua te nofo lei saukatoa, te mafai o agai atu ki fakalavelave, mo te olaga manuia mo aso mai mua.

Tapula:

1. Atili fakaleiga o galuega ki te agaiatuga a pokotiaga o aso nei mo aso mai mua
2. Fakalei te malamalama mo te fakagaluegaga o mau mautinoa, fakaasiiga mo sukesukega o fakalavelave i koga pokotia, o fakatino ei a polokalame e agai atu mo te fakafolikiiga o fakalavelave tupu
3. Atili fakalei a fakanofoga o taupulega mo te mafai o fakamaua kae fakagalue a tupe fesoasoani mo mafulifuliga o tau o aso mo fakalavelave tupu
4. Atiakega fakatutu o Tuvalu ka faite ke mafai o agai a pokotiaga mai mafulifuliga o tau-o-aso, fakalavelave tupu, mo mafuliga i aso mai mua
5. Ke fakamautinoa te toka o Enetise kae fakafoliki te fakamafua o keesi lailai i loto i Tuvalu i aso mai mua
6. Palani mo aofaga ko la e taugatonu mo fakatoka i tulaga o te agai atu pela foki te toe fakafokiiga ki tulaga tai lei a te atufenua i taimi o fakalavelave
7. Fakapatonuga te nofo tokaaga malie o tino Tuvalu mai pokotiaga o mafulifuliga o tau o aso mo te fakatumauga o te tu-saoloto o Tuvalu

Masaua te agaaga fakafetai mo fesoasoani ne maua mai fakapotopotoga o te Pasefika, SPREP, SOPAC/SPC, UNDP mo te AusAID o fakafaigofie a te faitega o te Fakanofoga mo Mafulifuliga o Tau-o-Aso mo te Palani fakagalue mo mafulifuliga o tau o aso mo fakalavelave tupu, kae toe akai ke fakatumau te loto fesoasoani.

Sainaaga:




Lenifoti Kauapa
Hui Pule Fenua o Nanumea



Reete Maluai
Hui Tupu o Nanumaga



Maeaga Seluseja
Ulu Aliko o Niutao




Fauvaka Keneseli
Pule Fenua o Nui



Semeli Sio
Sui Ulu Aliko o Vaitupu




Hosea Fapaologa
Ulu Aliko o Nukufetau




Mesako Usufono
Ulu Fenua o Funafuti



Aifou Tafia
Ulu Fenua o Nukulaelae



Hon. Willy Telavi
Ulu o te Malo Tuvalu



Hon. Namoliki Sualiki
Sui o Sui Malu kite Palamene



Hon. Apisai Ielemia
Takitaki o te Fonotaga

Fakatomuaga

Te *Kaniva* (Fakanofoga mo Mafulifuliga o Tau-o-Aso) e toki i ei a tapula mo galuega fakamoe a te Malo fakatasi mo tino Tuvalu o agai atu ki fakalavelave mo pokotiaga mai mafulifuliga o tau o aso mo fakalavelave tupu fakafuasei mo te sua 10 tausaga (2012 – 2021). Te Fakanofoga tenei e fakatu iei e 7 tapula mo aofaga o agai a fakalavelave mo fakamoemoega o te Malo mo tino Tuvalu, e fakapatonu ei te nofo lei kae tokaagamalie.

A te Fakanofoga tenei e isi ne sokoga ki te palani saukatoa mo mafulifuliga tau o aso mo puipuiga ki mea tupu fafuasei (Palani Fakagalue). I loto i te Fakanofoga tenei mo te Palani Fakagalue, a laua ka fakasaga tonu ki luga i te fakafolikiga o pokotiaga pena foki te fakafaigofiega o agai atu a pokotiaga, vaega na e isi se fakakesega ia laua e fakamatala iloto i tusi konei e lua.

Te Fakanofoga tenei ne fakaaofia ne ia a vaega atiakega kesekese mo olaga masani o tino Tuvalu ona ko te matea atu o pokotiakaga ki feitu konei. Tela la se mea e taaua ke faulu ki loto galuega i loto i te Palani Fakagalue tenei a tapula fakamoe o *Te Kakeega II* mo fakanofoga o Palani Atiake a Fenua takitasi.



Mafaufauga takitaki o te Fakanofoga

Tuvalu tela e tusa mo te 26km² te lasi o tena lauके kae 9561 tino e ola i luga i fenua e 8 e tu nei i te tokofa o toe atufenua foliki i te lalolagi mafai ko fakatulaga i te lasi o lauके. Funafuti, tela e tu ei te laumua o Tuvalu, e nofo ei e tai afa o te aofaki o tino Tuvalu. A fakalavelave konei e pokotia i ei a Tuvalu mai mafuilifuliga o tau o aso e tai pau foki mo fakalavelave ko la e pokotia ei niisi atufenua foliki. Kae ona ko Tuvalu se atufenua foliki kae malalo, e se uke foki ana maumea totino mo maumea i tupe, e lasi kii te mafai o pokotia malosi mai mafuilifuliga o tau o aso fakatasi mo fakalavelave tupu fakafuasei.

A fenua katoa o Tuvalu e malalo, tela e nofo ki se 3 mita mai luga i te levolo o te tai maluga. Te fanaka o te levolo o te tai se pokotiaga ki luga i ola, kope mo olaga o tino, mo koga e nofo iei mea ola ka pokotia malosi ona ko te lasi o lauके ko la ne keli i taimi o taua i te lua (WWII). A te vai ko fanaka mai lalo i te lauके pena foki mo tai ko lofia ki luga i lauके. Te fanaka o te vela o te tai mo te vanimonimo e fakafoliki ne ia te ola lei o lakau kaina mo meaola i te tai, ka lasi foki te vai e ave keatea mai te one kae fakamasei foki ki ola lei o tino. Mai luga i suksesukega fakasaenisi ne fakapatonu iei me i te levolo o te tai ne fanaka ki se maluga e 2-3mm/tausaga ako te vela ne fanaka ise 0.2°C/10 tausaga i te 60 tausaga ko teka atu nei kae fakatautau ke tumau tena fanaka i aso mai mua. Vaega lasi o fakalavelave mo pokotiaga ko la manakogina ke sagatonu Tuvalu o agai kae fakafoliki te pokotia o tino, lauके mo meaola iei konei e tusi fakasolo mai lalo:

- Te fanaka o te levolo o te tai
- Taimi tupu mo te malosi o matagi malosi mo afaa
- Te kaina o tafatai mo lauके galo
- Te oko o te tai ki loto i vai, one mo lauके toki lakau kaina
- Te gasolo o seai o mea ola (lakau, manu mo ika)
- Taulaa
- Galu lasi
- Te fanaka o te vela
- Te mate o kamu/akau

Ona ko te uke o galuega autu tonu ki luga i te fakafolikiga o pokotiaga mafua mai i fakalavelave tupu mo agai atuga ki fakalavelave mafua mai i mafuilifuliga o tau o aso, a te Fakanofoga tenei ka taumafai o galue ki auala ke talafeagai a fakanofoga konei, fakatokaga o galuega fai mo te fakalauēfaga o te iloa mo te mafai o fakataunu a galuega ko la e tusi i loto i te Palani Fakagaluega (NSAP).

Mafaufauga fakavae ki ei te Fakanofoga

Te *Kaniva* ne faite mai luga i manatu takitakikolako oti ne fakatoka mo takitaki ki ei te fakagaluega o galuega ko la e tusi i loto i te Fakanofoga tenei ko te mea ke olo tasi mo manakoga i loto i *Te Kakeega II* (mo ana lomiga fou), te National Adaptation Program of Actions (2007), te National Climate Change Blueprint (2006), te National Water Policy (tenei koi fakatoka), te National Energy Policy (2009) mo te National Disaster Risk Management Plan:

- A te Fakanofoga tenei se kope totino o te Malo mo tino Tuvalu fakatasi mo Kaupule i luga i fenua takitasi. Te palaniga mo te fakagaluega o te Fakanofoga tenei e panaki mo te Malo o Tuvalu, tino Tuvalu mo Kaupule takitasi fakatasi ei mo fesoasoani mai Malo i tua atu o te atufenua, fakapotopotoga atiake i te lalolagi, kamupane mo fakapotopotoga se kau i te malo.
- Se taumafaiga tela ne faite ke olo tonu mo te fakagaluega o Te Kakeega II, Palani Atiake a Fenua (ISP) mo niisi polokalame ko la e taugatonu mo te Fakanofoga tenei pela mo:
 - The Pacific Adaptation to Climate Change project (PACC)
 - Integrated Water Resource Management project (IWRM)
 - The National Adaptation Programme of Action (NAPA)
 - The UN Framework Convention on Climate Change Second National Communication (SNC)
 - The Pacific Islands Greenhouse Gas Abatement through Renewable Energy Project (PIGGAREP)
 - The National Biodiversity Strategic Action Plan (NBSAP)
 - The UN Convention to Combat Desertification Sustainable Land Management project (SLM) and National Action Programme (NAP)
 - The European Development Fund (EDF 10)
 - The Coping with Climate Change in the Pacific Island Region project (CCCPIR)
 - Sose tusitusiga mo lipoti ko la e olo tonu mo mataupu i loto i te Fakanofoga tenei.

- Polokalame ki luga i mafulifuliga o tau o aso e tau katoa o fakatakitaki ne te Fakanofoga tenei fakatasi mo te Palani Fakagalue (NSAP) 2012, ko la ka fesoasoani malosi ki te fakagaluega o te tulafono mo te puipuiga o te enivalomene (Environment Protection Act, 2008), mo te tulafono mo Fakalavelave Tupu Fakafuasei (National Disaster Act, 2007) mo te Fakatokaaga e Fakafoliki ei a Fakalavelave Tupu Fakafuasei (National Disaster Risk Management Arrangements 2011).
- Ke fakapau a atiakega ki luga i vaega kesekese o tino i loto i fenua e valu, kae ke amanaia foki te kesekesega o manakoga mo te mafai ne tino o maua a avanoaga ki galuega, meakai mo niisi manuia ko la e mafai o maua ne se tino.
- Ke amanaia kae ke tausi fakalei a poto, tuu mo iloga o Tuvalu.
- Ke fakataua te saolotoga o tino, tulafono, mo te seai se fakakesekese ki luga i tagata mo fafine.
- Ke lago maloo a atiakega tutumau (aofia iei maumea tau tupe, atiakega o olaga mo fakatelega o malo, mo te tokaagamalie o te natula).
- Fakaaoga auala ko la e aofia ei tulaga kesekese o galuega pena foki te kaufakatasi o tino ki loto i faiga ikuga, e auala i te fai o faipatiga, fakaaoga o poto taumua, poto faka-saenisi, mo te fai asiiga mo iloiloga ki luga i te fakataunuga o te Fakanofoga.
- E manakogina ke fakalei tulaga o poto faka-saenisi mo poto fou fakatasi mo te lasi te fakaaoga o mea fai galuega o agai ki fakalavelave mai mafulifuliga o tau o aso, ko te mea ke katoatoa te lei o aofaga ki te atili fakaleiga o te mafai o tino mo mea ola katoa o ola agai ki fakalavelave mo pokotiaga o mafulifuliga o tau o aso.

Fakamatalaga mo te pogai o te Fakanofoga


Te kiloga ki mua o *Te Kakeega II* e penei “*Mai tausaga 2015, takitakigina ne te malosī o talitonuga fakate-lotu e pela mo te munatuku a Tuvalu – ‘Tuvalu mo te Atua’ – ko oti ne maua ne tatou (tino Tuvalu) se olaga lei, akoakogina, tokaagamalie mo te manuia o Tuvalu.*” Te Fakanofoga tenei e taaua kii ki te fakataunuga o te kiloga ki mua a *Te Kakeega II* mo sose palani atiake mai mua.

Te pogai o *Te Kaniva*: Fakanofoga a Tuvalu mo Mafulifuliga o Tau-o-Aso ko te fakatinoga o aofaga taaua e atili fakalei te tulaga o te Malo o Tuvalu i ana galuega fakamoe o agai atu ki mafulifuliga o tau o aso, i tulaga e mafai o pokotia i aso nei mo aso mai mua. Te Fakanofoga tenei e fakamalosi ne i a te galue fakatasi o fakalauēfa te mafai ne Tuvalu o fakafoliki a fakalavelave mo pokotiaga mai mfaulifauliga o tau o aso e fepaki mo ia, maise ko fakalavelave lasi ko la e mafai o afaina a ola o tino, taofi o te tele ki mua o te maumea o te atufenua, fakamasei ki te enivalomene mo kope lasi. Te Fakanofoga foki tenei e fesoasoani o fakaseai se olaga mativa i tino ko la e faigata te maua o mea e tausi te olaga, ko te mea ke maua se olaga lei, akoakogina kae ola tokaaga malie kae manuia. Mai galuega fai fakatasi mo *Te Kakeega II*, a te Fakanofoga tenei ka faulu ki loto i palani atiake mo palani fakagalue a sose fakapotopotoga mo mata galuega. Te tapula o te Fakanofoga tenei e fakamaina i lalo i te kiloga ki mua.

KILOGA KI MUA

Ke puipui a Tuvalu pela me se atufenua tutokotasi mo ana tuu mo ana faifaiga kae ke fakalei aka foki a tena mafai ke maua te nofo lei saukatoa, te mafai o agai atu ki fakalavelave, mo te olaga manuia mo aso mai mua.

Te sokoga o *Te Kaniva* ki *Te Kakeega* // mo te Palani Fakagalue NSAP



Tapula o te Fakanofoga, Aofaga mo Fakamoemoega

A tapula taaua konei i loto i te Fakanofoga tenei ne fakavae mai luga i faipatiiga ne fai e aofia ei a il-oiloga i feitu kesekese, faitioga a te matagaluega fakapitioa, te malo, fakapotopotoga kesekese, kau-fai-pisinisi mo faipatiiga kaufakatasi ne fai i fenua katoa mo akoakoga uke ne fai, fakatasi mo te Fonotaga a te Atufenua i Mafulifuliga o Tau-o-Aso (National Climate Change Summit) tela ne fakatasi atu ki ei a takitaki o fenua pela foki mo te malo, fakapotopotoga kesekese, lotu mo tamaliki akoga. A tapula fakapitioa konei e fakavae ei atiakega tutumau i Tuvalu mo te manakoga fakavave o agai atu kae toki a mafulifuliga o tauo-aso ki loto i fakanofoga, palani mo fakataugasene o fakafoliki a fakalavelave tupu.



TAPULA 1

Atili fakaleiga o galuega ki te agaiatuga a pokotiaga o aso nei mo aso mai mua

Agaiatuuga ki tulaga fakamataku mo pokotiaga o mafulifuliga o tau o aso e taaua kii ki tino Tuvalu ke mafai o ola i loto i Tuvalu. Galuega o agai atu ki fakalavelave, ko la e fai i te vaitaimi nei e aoga ki te fakatokaga mo te fakalauefaga o te mafai ne tino Tuvalu ko la e manako o ola i te atufenua o latou pela loa mo tuu mo faifaiga o te olaaga masani.

MATAUPU TAAUA:

- Togi o fakamaseiga mai mafulifuliga o tau o aso ki luga i te ola lei, olaga masani o tino mo maumea.
- Se uke a maumea totino
- Se lasi te mainaga mo te foliki te iloa
- Lakau kaina fakamaseigina ne matagi malosi, taulaa mo lofiaga o te tai ki luga i te laukele
- Te fanaka o te fuainumela o tino ki luga fakatasi mo lotou manakoga, pena foki te kaina o tafatai i taimi o matagi malosi mo afaa, e fakalasi ne ia te fakamasei ki luga i tafatai.
- Atafaiga o vai
- Taulaa
- Seai se aofaga mo te galue fakatasi o matagaluega mo fakapotopotoga o amanaia te aoga o te galue fakatasi ki se kiloga e puipui ei a meaola katoa i luga i te koga tena.
- Se lava o tulafono mo fakanofoga fakagalue
- Mutana o avanoaga ki galuega ko la e maua ei ne tupe
- Foliki te fesoasoani mai fenua ko la e lasi te fakamafua ne latou a keesi lailai (GHG) ki te fakatupega o toe faitega fakalei o feitu ko la ne pokotia mai mafulifuliga o tau o aso.



| AOFAGA | FAKAMOEMOEGA / IKUGA FAKATAUTAU |
|--|--|
| <p>1.1 A fakalavelave ki luga i te ola lei mo olaga masani o tino (aofia foki ei te tenita) mai mafuilifuliga o tau o aso mo fakalavelave tupu fakafuasei ka fesoasoani ki te fakatokaga o polokalame mo fenua takitasi o agai atu ki fakalavelave kona.</p> | <ul style="list-style-type: none"> ■ Olaga masani mo te ola fakatokatoka o agai fakalavelave ka fakamalosigina. ■ Ka lasi te iloa mo te maina i pokotiaga mo te togi o fakalavelave mafua mai i te mafuilifuli o tau o aso mo fakalavelave tupu. ■ Fakamatalaga taaua i feitu o te tenita ka maua gofie ke fakaaoga i fakatokaga o palani. |
| <p>1.2 Fai a suksesukega mo iloiloga ki vaega lakau kaina ko la e mafai o ola i laukele suataia vela (pela mo pulaka) mo koga vela, pena foki lakau ko la e lasi te fesoasoanio puipui a tafatai.</p> | <ul style="list-style-type: none"> ■ Faigofie te tumau o maua o meakai. ■ Tafatai ka puipui fakalei e auala i polokalame tokiga o lakau mo niisi fuafuaga taugatonu. |
| <p>1.3 Ke fakagalue fakalei te atafaiga mo te fakasoaga o vai (aofia iei vai ko la fuli mai i te tai)e auala i te fakagaluega o Palani Fakagalue mo fenua takitasi ki luga i te atafaiga o vai.</p> | <ul style="list-style-type: none"> ■ Fakataumau te lava o vai e maua ne tino (ke uke kae maa foki a vai). ■ Ko toka a fakatokaga mo taimi o taula mo niisi fakalavelave fakamataku. |
| <p>1.4 Galue fakatasi i te fakatokaga o palani mo te atafaiga o te tai, tafatai mo laukele fakatasi mo meaola katoa iei (Whole Island Systems Management/ ecosystem base management).</p> | <ul style="list-style-type: none"> ■ Ka amanaia a sokooga o galuega o agai atu ki pokotiaga mo te fakafolikiga o fakalavelave tupu me ka fakamalosi ei te mafai o meaola o agai ki fakalavelave mo pokotiaga. ■ Meaola i tai mo kogaatai masa/tafatai ka atafai fakalei ke tutumau fakatau ki pokotiaga mai mafuilifuliga o tau o aso, ke mafai ne tino Tuvaluola lei. |
| <p>1.5 Ke fakaaoga a suksesukega ko ot i ne fai ki luga i te matematega te gasuesuega o ika faimalaga ona ko te mafuilifuli o tau o aso.</p> | <ul style="list-style-type: none"> ■ Fakatumau te maumea, te uke o vaega meakai mo vaega meaola i Tuvalu. ■ Te iloa mo poto fou ko la e taugatonu mo te fakaleiga kae fakalasi te maumea. |
| <p>1.6 Polokalame mo te fakalauefaga te iloa mo te fakamalosiga o tino ke fai a tiute, i feitu tau mafuilifuliga o tau o aso mo fakalavelave tupu, ka fakatoka mo fenua takitasi.</p> | <ul style="list-style-type: none"> ■ Aofaga o agai atu ki fakalavelave mai mafuilifuliga o tau o aso ka toki ki loto i palani atiake mo ikuga fai ke oko foki ki galuega masani a kaiga takitasi. |
| <p>1.7 Tulafono mo fakanofoga ka fakatoka ke puipui ei te fakaaoga fakalei o meaola i te tai, tafatai mo te laukele i feitu tau ki luga i pokotiaga mai mafuilifuliga o tau o aso</p> | <ul style="list-style-type: none"> ■ Sose tulafono tela e autu ki te mataupu tenei ka fakalei atu te fakagaluega. ■ Pokotiaga mo fakalavelave mai mafuilifuliga o tau o aso mo fakalavelave tupu ki luga i meaola ka fakafoliki mo te taumafaiga ke fakaseai. |
| <p>1.8 Fai ne fakatokaga taugatonu ko la e mafai ei o togi tupe a kope mo ola o tino ko la e galo io me fakamaseigina ne fakalavelave o mafuilifuliga o tau o aso</p> | <ul style="list-style-type: none"> ■ Ke mafai ne atufenua ko la e lasi te fakamafua ne latou okeesi lailai (GHG) o togi tupe te toe faitega o koga ko la ne fakamasei ona ko mafuilifuliga o tau o aso |

TAPULA 2

Fakalei te malamalama mo te fakagaluegaga o mau mautinoa, fakaasiiga mo sukesukega o fakalavelave i koga pokotia, o fakatino ei a polokalame e agai atu mo te fakafolikiiga o fakalavelave tupu

Te faitega o te iloa mo te mafai i mea tau saienisi mo sukesukega i loto i Tuvalu se vaega taaua kii i te Fakanofoga tenei mo tena Palani Fakagalue. Te manakoga ke iloa fakalei tulaga o mafulifuliga o tau o aso mo ana fakalavelave faka-Tuvalu ko te mea ke mafai o fakatoka ki loto ki te Fakanofoga pela foki ki taupulega e tumau te fakataaua. E isi faeloa se sokoga o te vaega nei ki galuega fai a te Matagaluega o Ueta.

MATAUPU TAAUA:

- Se lava te iloa mo te mafai o fai a galuega mo te se lava o fakanofoga mo tulafono e fakagalue i loto i te Matagaluega o Ueta (Tuvalu Meteorological Service).
- A masini faigaluega ko too leva, manakogina ke sui ki mea fou.
- Se lava te iloa, tupe mo tino galue o fuli a fakamatalaga o tau o aso mo ueta ke mafai o fakaaoga ne sose tino.
- Se lasi te mainaga o tino mo tamaliki akoga i fakamatalaga o tau o aso.
- Se fakatuagagina a mea fesokotaki ki fenua i tua atu o te laumua.
- Maua gataa o fakamatalaga taugatonu mo galuega ki te fakafolikiga te fakamafua o keesi la ilai pena foki mo galuega o agai atu ki pokotiaga mai mafulifuliga o tau o aso.
- Se lava o te iloa mo te atamai o fesokotaki i taimi o faipatiga mo fonotaga



| AOFAGA | FAKAMOEMOEAGA / IKUGA FAKATAUTAU |
|--|---|
| <p>2.1 Fakalei akega o te mafai o te Matagaluega o te Ueta aofia ei koga-galue i fenua i tua atu o Funafuti.</p> | <ul style="list-style-type: none"> ■ Se Matagaluega o te Ueta e galue lei mo tulafono, fakanofoga taugatonu mo faifaiga mo te fakaaogaaga o mau mautinoa e toka faeloa kae fakagalue mo fakatino ei te fakaaogaaga o mau mautinoa i tulaga o te ma tema teega o ueta mo tau-o-aso aofia ei a mau mautinoa i tala fakasolopito ■ Te mafai o fai a iloiloga o mafulifuliga o tau-o-aso e toka faeloa i te matagaluega o te ueta. ■ Mea faigaluega ko leva ke sui kae atafai ■ Te mafai o fakataunuu a manakoga o tulaga fakapitoo konei (pela mo te matagaluega tokilau mo te fagaimanu, matagaluega o te kaufaiika, matagaluega o tinomatamata, feitu ki olomalaga i te ea, fafine mo tagata) ■ Tulaga katoatoa te iloa o tino i fakaasiiga tau-ueta mo mafulifuliga o tau-o-aso |
| <p>2.2 Tulaga galue fakalei o fesokotakiiga i fenua i tua atu o Funafuti mo fakaasiiga o te ueta mo mafulifuliga o tau-o-aso.</p> | <ul style="list-style-type: none"> ■ Fesokotakiiga i te vasia o fenua ke fakalei atu te mafai o maua a fakapulaaga kae ave foki a matematega ne fai. |
| <p>2.3 A fakaasiiga mo mafulifuliga o tau-o-aso mo fakalavelave tupu ke toki ki loto i fakatokaaga o mataupu tau akoakoga</p> | <ul style="list-style-type: none"> ■ Tulaga maluga o te malamalama i tamaliki akooga. |
| <p>2.4 A suksesukega fakapitoo e fakavae ei a fuafuga mo te agaiatuuga mo te fakafolikiiga o pokotiaga o mafulifuliga o tau-o-aso.</p> | <ul style="list-style-type: none"> ■ A polokalame mo te agaiatuuga mo te fakafolikiiga o te mafulifuliga o tau-o-aso ne fakatoka fakalei. |
| <p>2.5 Te mafai i te tulaga o te atufenua i fakafesagaiiga i tuaatu o te atufenua ka mafai o fakalei atu.</p> | <ul style="list-style-type: none"> ■ Tuvalu ke tumau o sui atu kae fai tusaga lei i fakafesagaiiga i tuaatu o te atufenua. |

TAPULA 3

Atili fakalei a fakanofoga o taupulega mo te mafai o fakamaua kae fakagalue a tupe fesoasoani mo mafulifuliga o tau o aso mo fakalavelave tupu

Tuvalu ke fakamalosi a fakatokaaga ki matagaluega ko te mea ke mafai o maua ne avanoaga lei i mea tau sene mai fakapotopotoga o te lalolagi mo te pasefika ko la e galue i mea tau mafulifuliga o tau o aso. Ka mafai iei o fakamalosi te mafai o te matagaluega e onono ki mafulifuliga o tau o aso ke pulepule lei, fakatoka a palani, fakafoliki mea tupu fafua sei, pela foki mea tau tulafono o lagoon maloo ki fakanofonofoga ko oti ne fakatoka, tulafono mo tino galue. Fakanofonofoga mo mea tau sene e manakogina malosia pela foki te matagaluega tela ka panaki mo te fakagaluegaaga (National Implementing Entity).

MATAUPU TAAUA:

- Se lava te iloa mo te mafai o minisituli/matagaluega o aofaga ke fakaaofia te mafulifuliga o tau o aso ki loti i polokalame fai me ko galuega.
- Se lava te iloa mo te mafai i taupulega fai o Kaupule i fenua takitasi.
- Palani Atiake o fenua takitasi e timomo fua te atagina o te mafulifuliga o tau o aso mo te fakafolikiga o mea tupu fafua sei.
- Se lava te iloa o fakataunu mo te pukelima o fakagalue fakalei mea tau sene.
- E isi se vaaivai o komiti fakatonutonu.
- Se lava te iloa mo te mafai o fakataunu kae fakatonu.
- Se lava te iloa o auala e fakaoko iei fekau ki tino feitu tau sene ki mafulifuliga o tau o aso.
- Se lava te iloa o fai a palani toetoe mo palani leva atu ko la e fakatautau iei a sene ke fakatutumau mo te fakaataaga mo aso mai mua.
- E isi se vaivai i fakatokaaga o matagaluega mo mafulifuliga o tau o aso, enivalomene, matagaluega tau-o-aso mo te matagaluega ki mea tupu fafua sei (e mavaevae kae foliki te lagoon o galue kaufakatasi mo te lototasi).



| AOFAGA | FAKAMOEMOEGA / IKUGA FAKATAUTAU |
|--|--|
| <p>3.1 Ke isi ne vaega mai mafulifuliga o tau-oaso mo fakalavelave tupu e toki ki loto i <i>Te Kakeega II</i> (pela foki mo palani atiake mai mua), palani fakatauga sene, pela foki mo palani me ko fakanofoga o matagaluega.</p> | <ul style="list-style-type: none"> ■ Ke isi se atamai iloto i minisituli mo matagaluega o fakaaofia mafulifuliga o tau o aso mo fakalavelave tupu ki loto i faitega o polotieki, fakatasi mo taimi e fakagalue iei pela foki taimi o iloilogaga. ■ Mafulifuliga o tau o aso mo fakalavelave tupu ke toki ki loto i fakanofoga o matagaluega, i palani mo fakagaluegaaga fakatauga sene mo so se atiakega me ko polokalame fou maimua. |
| <p>3.2 Fakamalosigina taupulega mo takitakiga (<i>Kaupule</i>) i fenua.</p> | <ul style="list-style-type: none"> ■ Manakogina taupulega o fenua ke malosi kae vave fakafesagai ko te mea ke mafai o toki ki loto i olotou palani atiake o mafulifuliga o tau o aso mo fakalavelave tupu pela foki pokotiaga. |
| <p>3.3 Fakamalosi fakatokaaga mo fakanofonofoga mea tau sene ke mafai o fakatupegina ne taugasoa fesoasoani (io me ko fakapotopotoga aka) a polokalame fai ki mafulifuliga o tau o aso mo fakalavelave tupu.</p> | <ul style="list-style-type: none"> ■ Ke fakatalitonugina ne taugasoa fesoasoani feitu tau sene a fakatokaga lei o taupulega mo fakanofoga o te atufenua. ■ Ke maluga kii te atamai feitu tau fakatokaaga o sene iloto i te Malo mo Kaupule ke mafai o fakamaua kae lipoti alaga sene pela foki fesoasoani mai tua. |
| <p>3.4 Ke mafai ne fakanofoga mo mea faigaluega o fakamalosia galuega fai a te Aid Coordination Unit, Kaunisila mo Mafulifuliga o Tau-o -aso mo te Komiti mo Fakalavelave Tupu.</p> | <ul style="list-style-type: none"> ■ Ke fakagalue a fakanofoga fakatasi mo tulafono foliki o te atufenua e fakatoka ei fakatelega mo fesoasoani ki taketi mo ikuga ki te mafulifuliga o tau o aso mo fakalavelave tupu. ■ Fakamalosi te galue tasi o palani, te fakagaluegaga, fakatakikiiga mo suksesukeega fakapatonu iloto i matagaluega a te Malo me mafai loa o fakataunu polokalame ki mafulifuliga o tau o aso mo fakalavelave tupu. ■ Ke fakalasi kae fakamaluga akoakoga feitu tau sene iloto i vasega kesekese mo fakapotopotoga fenua kiluga i mafulifuliga o tau o aso. |
| <p>3.5 Ke isi se Tupe Fakana a te Atufenua mo lagomaloo a galuega fai i te agaiatuga mo te fakafolikiga o mafulifuliga o tau o aso mo fakalavelave tupu.</p> | <ul style="list-style-type: none"> ■ Fakatutumauga mo te mautinoa ke isine tupe mo aofaga fakavave a palani toetoe io me tai leva atu ki mafulifuliga o tau o aso mo fakalavelave tupu pela foki ki te fakagaluega o feitu o te agaiatu, fakafoliki mo te fakamutanaifoga o feitu taaua o fakalavelave tupu. ■ Ko isi se Tupe Fakanaa fakapitoa mo mafulifuliga o tau o aso. |
| <p>3.6 Fakamalosigina fakatokaaga o matagaluega mo mafulifuliga o tau o aso, fakalavelave tupu mo ueta o avaka te tulaga galue kau fakatasi.</p> | <ul style="list-style-type: none"> ■ Avaka tulaga o te galue kau fakatasi, tufa-pau te iloa, fakamatalaaga fakafuainumela mo fakamatalaaga masani. ■ Tuku fakatasiga o mea lei ne tauloto fakatasi mo fakaakoakoga tafasili i te lei, ke toe fai kae tufa-pau |

TAPULA 4

Atiakega fakatutu o Tuvalu ka faite ke mafai o agai a pokotiaga mai mafuilifuliga o tau-o-aso, fakalavelave tupu, mo mafuliga i aso mai mua

Te fakamalosiga ke lei mea-fakatutu se vaega taaua kii me fakatoka neia te olaga tokaagamalie o tino Tuvalu i te fakaaogaga o mea oloolomalaga mo mea faipati o fesokotaki mo fenua takitasi, pela foki te aveavega o kope, faigamalaga ki akoga, fakaimasaki mo te tino galue o te malo. Te fakamalosi o mea-fakatutu e aoga foki loa i te fakalafiiga i taimi o fakalavelave tupu mo fakalavelave seki mafauaugina.

MATAUPU TAAUA:

- Mea-fakatutu seki mafai o faite ki te tulafono ne fai kae seki mafai foki o atagina iei fakatokaaga mo aso maimua.
- Seai se palani/fakanofoga ki te fakaaogaga o laukele/laumanafa.
- Te tulafono mo mea-fakatutu seki mafai o fakagalue.
- Palani o Fenua takitasi (ISP) ke mafai o fakaaofia te fakaaogaga o laukele/laumanafa.
- Se lava akoakoga ki te fakaaogaga o laukele/laumanafa.
- Te faitega o puipui tai mo auala e avaka ne laua te kaina o tafatai mo te lofia o koga malalalo.



| AOFAGA | FAKAMOEMOEGA / IKUGA FAKATAUTAU |
|--|--|
| <p>4.1 Ke agai kae puipui a mea fakatutu taaua mai pokotiaga o mafuilifuliga o tau o aso, tau masei seki fakamoemogina, fakalavelave tupu pela foki ki mafuiliga o tau o aso maimua.</p> | <ul style="list-style-type: none"> ■ Mea fakatutu taaua (pela mo: te fale iti, fale fesokotakiga, te koga e fakamau iei tau o aso, malae vakalele, taulaga vaka, auala, fakaimasaki, akoga, falesa mo falekaupule i Funafuti mo fenua mai tua atu, mo niisi) ke puipui fakalei kae ke galue lei i taimi katoa. |
| <p>4.2 Palani fakalei mo te natula pela foki atafaiga o atiakega iluga i Funafuti mo fenua mai tua.</p> | <ul style="list-style-type: none"> ■ Fakalei kae fakasoasoa lei palani mo te natula. ■ Palani mo te natula ke fakaaofia iloto i palani saukatoa o fenua takitasi. ■ Te tulafono mo te fakatutuga o fale ke malosii te fakagaluegaga ki luga i mea fakatutu taaua pela foki ki faitega o fale laupapa mo fale fakasameni ke mafai o agai atu mafuilifuliga o tau o aso. ■ Fakauke aka akoakoga ki fakapotopotoga/fenua ki mataupu tau atu ki fakamaseiga ki kope mai mafuilifuliga o tau o aso mo fakalavelave tupu. ■ Faitega o puipui tai mo kosiuei ke tautali ki faifaiga tafasili te lei mo Tuvalu e fakafoliki iei te pokotia vave mai pokotiaga o mafuilifuliga o tau o aso, tau masei seki fakamoemogina pela foki fakamatakuga mai faitega o tou fenua. |

TAPULA 5

Ke fakamautinoa te toka o Enetise kae fakafoliki te fakamafua o keesi lailai i loto i Tuvalu i aso mai mua

Te aofaki o keesi lailai e fakamafua ne Tuvalu fakatusa ki keesi mai fenua katoa o te lalolagi e toe itiiti ko seai. Kae ui ei a Tuvalu e tumau tena lako maloo ki fakatokaaga o fakafoliki te fakaaoga o keesi lailai. I te tausaga 2009, ne fakatoka ne te malo o Tuvalu a se Fakanofoga mo Enetise fakatasi mo te Palani Fakaglu, tela e fakasaga tonu ki luga i te salaga o auala e fakamlosi ei te fakaaoga tau o enetise mo te fakaaoga o enetise togimama kae tutumau.

MATAUPU TAAUA:

- Te lasi te ola fakanaa ki enetise maua mai luga i oela.
- Te seai ne akoakoga fakamaina te aoga mo te taaua o fakaaoga fakalei a enetise.
- Se lava o tulafono.
- Te togi mafa o mea fai galuega ko la e fakaaoga mo enetise tutumau.
- Se fakaaoga fakalei o enetise maua mai i keesi mai fakasufaga mo fekau o manu pela mo puaka.



| AOFAGA | IKUGA FAKATAUTAU |
|---|---|
| <p>5.1 Fakafoliki te fakanaa ki fiuolo pela mo oela kae ke salasala a avanoaaga ke mafai o fakaaoga a enetise tutumau.</p> | <ul style="list-style-type: none"> ▪ Ke fakatumau te tautua ki te taketi o te 100% ki enetise tutumau tela ko oti ne muagutu ne tou takitaki mo faleiti. ▪ Ke fakaatili lei atu te tulaga ki te fakamauga o enetise ko la e ma, taugatonu, maua gofie, kae tai solotonu mo tulaga o te maumea i te taulasiga o tino Tuvalu. |
| <p>5.2 Ke fakataua a enetise ko la e lei e pela foki mo te fakatelega o polokalame i te atafaiga o enetise.</p> | <ul style="list-style-type: none"> ▪ Fakalei te maua o enetise seai ne pokotiaga, maa, taugatonu kae togi mama. |
| <p>5.3 Tulafono mo puipuiga ki enetise ko la ka fakamalosi ne latou a enetise lei katoatoa pela foki mo enetise tutumau.</p> | <ul style="list-style-type: none"> ▪ Ko isi ne Tulafono Enetise Taugatonu mo Tulafono Enetise Tutumau. ▪ Ko isi kae ko fakagalue foki a Tulafono Foliki o Enetise Tuagatonu mo Enetise Tutumau. |
| <p>5.4 Palani ke fakafoliki a keesi ko la e fakamafua ne latou te mafuilifuliga o tau o aso kae fakamaluga te kiloga ki te tokilakau mo te matagaluega i te atafaiga o kaiga ke fakafoliki a keesi konei.</p> | <ul style="list-style-type: none"> ▪ Ke mumea aka te tulaga o taumafaiga ki te fakafolikiga o keesi mai feitu kesekese iloto i te Atufenua. |

TAPULA 6

Palani mo aofaga ko la e taugatonu mo fakatoka i tulaga o te agai atu pela foki te toe fakafokiiga ki tulaga tai lei a te atufenua i taimi o fakalavelave

Fakatokatokga mo te puipuga o fakalavelave tupu e taaua kii ki tulaga e tausi a ola o tino pena foki mo kope. Galuega o agai mo te toe fakaleiga o pokotiaga mai fakalavelave tupu e tau o fakaaoga a fautuaga mo mea ne tauloto mai i faifaiga penei ne fai muamua ko te mea ke se lasi te pokotia o tino, mea ola katoa mo kope.

A te Tuvalu Disaster Risk Management Arrangement (2011) e toki katoa iei a galuega taaua ko la e tau o fai ke fakaseai a mea tupu mai fakalavelave fakatasi mo sokoga ki fakalavelave mai mafuilfuliga o tau o aso mo fakalavelave fakamafua ne te tagata. A te fakataunuga o galuega i lalo i palani konei ka fesoasoani malosi o puipui te saogalemu i feitu katoa.

MATAUPU TAAUA:

- Tulaga se toka kae faigofie te pokotia ne fakalavelave mai mafuilfuliga o tau o aso mo niisi tulaga fakamataku.
- Se lasi te fai o akoakoga fakamasani ki mea e tau o fai ne tino i taimi e tupu ei se fakalavelave.
- Seai se fakatokaaga mo fakalavelave.
- Se lava te iloa mo te mainaaga.
- Se toka a fakatokaaga mo tino ko la se lava te malosi mo te mafai o fai se mea i taimi e tupu ei te fakalavelave mo taimi e oti ei ne tupu se fakalavelave.



| AOFAGA | FAKAMOEMOEGA / IKUGA FAKATAUTAU |
|---|--|
| <p>6.1 Ke toe fakamalosi te galue fakatasi i taimi o fakalavelave. Ke kau fakatasi a levolo katoa o te atufenua, matagaluega o te maalo ko la e taugatonu ke oko foki loa ki fenua mo fakapotopotoga.</p> | <ul style="list-style-type: none"> ▪ Ka tokaaga malie a sokotakiga ke oko ki faka telega o polokalame i taimi o fakalavelave kae ka tasi te maina i levolo kesekeese. |
| <p>6.2 Ke atili fakalei atu a te toka o tatou i fakalavelave kae maise a pokotiaga ko la e mafua mai fakalavelave.</p> | <ul style="list-style-type: none"> ▪ Ka maluga te tulaga o te toka o levolo katoa e aofia ei a te atufenua, fenua takitasi ke oko ki fakapotopotoga i te agai atu ki pokotiaga mai mafuilfuliga o tau o aso pela foki mo fakapogaiga o fakalavelave. |
| <p>6.3 Te taugatonu o aofaga mo agai atu ki fakalavelave.</p> | <ul style="list-style-type: none"> ▪ Ka taimi tonu a fakatokaga i fakalavelave tela ka fakafoliki ei te afaina o ola pela foki te pokotia o tino. |
| <p>6.4 Ke fakamalosi a faifaiga mo polokalame ki te toe fakatokaaga o te atufenua mafai ne poko ne te fakalavelave.</p> | <ul style="list-style-type: none"> ▪ Ka mafai o lavea a manakoga taaua kii loa mai ia latou ko la e lasi te pokotia, tela ka mafai o matemate ei a manakoga totino ko la e lasi te faka-taaua ko te mea ke toka mo te fakalavelave mafai ko fai a fakatokatokaga. |

TAPULA 7

Fakapatonuga te nofo tokaaga malie o tino Tuvalu mai pokotiaga o mafuilifuliga o tau o aso mo te fakatumauga o te tu-saoloto o Tuvalu

Mai fakalavelave e uke e fepaki mo tino Tuvalu ona ko mafuilifuliga o tau o aso, a tino Tuvalu ka manako o puipui a tena iloga Tuvalu, kae kafari ko se mafai o nofo o ola i luga i Tuvalu ona ko fakalavelave mai mafuilifuliga o tau o aso, e manakogina malosi ko tino Tuvalu ke isi ne lotou fakatokaaga e fai mo te lei o te olaga mo aso mai mua.

MATAUPU TAAUA:

- Se mautinoa te kaufakatai o fenua o te lalolagi o fakafoliki te fakamafua o keesi lailai
- Fakaasiiga o pokotiaga mai mafuilifuliga o tau o aso (pela mo taula, kaina o tafatai, tai fanaka mo niisi) ko lasi te matea e tupu i loto i Tuvalu.
- Manakogina ke puipui te kogaatai fakapitoa o Tuvalu (EEZ)
- Seai ne tulafono mo fakanofoga o te lalolagi mo tino ko la ko manakogina ke malaga o ola i se isi atufenua ona ko fakalavelave mai mafuilifuliga o tau o aso
- Te aofaki tupe manakogina mafai ko fakamasiki a tino Tuvalu o ola ise koga fakatea ona ko fakalavelave mai mafuilifuliga o tau o aso.
- Te nofo sapolepole ki te galo o Tuvalu fakatasi mo faifaiga mo iloga.



| AOFAGA | FAKAMOEMOEGA / IKUGA FAKATAUTAU |
|--|---|
| <p>7.1 Fai ne fakatokaaga ko te kogaatai o Tuvalu ke tumau te pule ne Tuvalu mafai e isi ne mafuliga ki laukele o Tuvalu ona ko mafulifuliga o tau o aso</p> | <ul style="list-style-type: none"> ▪ Te Fakavae o Tuvalu fakatasi mo tulafono ko la ko oti ne fakatalia kae fakagalue ke toe iloilo ko te mea ke fakaaofia a fuafuaga o fakatumau te Tu-saoloto o Tuvalu fakatasi mo tena kogaatai ona ko pokotiaga mai mafulifuliga o tau o aso. |
| <p>7.2 Ke fakalauefa te iloa mo te mafai ne Tuvalu o tumau o fai ana atiakega kae palani aofaga pela me se atufenua.</p> | <ul style="list-style-type: none"> ▪ Tuvalu ko toka lei o agai atu a fakalavelave mafua mai i mafulifuliga o tau o aso. ▪ Fakamauaaga o se fakanofoga i mea tau tulafono a te lalolagi ke mafai ne tino Tuvalu o olo o ola ite sua atufenua, kae ke tália foki se koga iloto ite sua atufenua mo fai te atufenua o Tuvalu mafai ko galo Tuvalu ona ko tai fanaka. |
| <p>7.3 Fakatoka ne avanoaga, pela mo te polokalame a NZ ko te PAC, ke mafai ne tino Tuvalu o olo atu ki niisi atufenua o ola iei ona ko te fakamataku o pokotiaga mai mafulifuliga o tau o aso ki te atufenua.</p> | <ul style="list-style-type: none"> ▪ Tuvalu ko toka ana fakatokaaga ki te olo o tino io me ko te faimaloo o ana tino ke gasue ki se isi fenua o ola iei ona ko fakamaseiga mai mafulifuliga o tau o aso. ▪ Fesokotaki mo niisi atufenua ki ne fakatokaga mo tino Tuvalu fia olo o ola i olotou atufenua ona ko mafulifuliga o tau o aso. |
| <p>7.4 Palani mo oloolomalaga mo palani mo te fakagasuega o tino mo fenua takitasi ka fakatoka ke toka mo se taimi ka tupu ei te fakalavelave.</p> | <ul style="list-style-type: none"> ▪ Tino Tuvalu ka tumau te isi ose koga lei mo ola. |

Fakagaluega o te Fakanofoga

Te Kaniva tenei ne faite i te talitonu me ka fesoasoani mai a taugasoa mo fakapotopotoga fenua o te lalolagi o lagomaloo te fakatupega o fakataunu ana manakoga.

Fakatokaaga ki te fakagaluega mo te fakataunuga o manakoga fakatasi mo fakatakitakiga o mea fai pela foki mo iloiloga o *Te Kaniva*, e tusi maea fakalei iloto i te Palani Fakagalue mo te Mafulifuliga o Tau-o-aso mo Fakalavelave Tupu (2012–2016). Te iloiloga o te Fakanofoga tenei e tau o fai i te 2016.



